



## Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателей, котры не вплатили ище пренумераты, просиме выровнати якнайскорше рахунки.

Пренумерата в краю:  
30 грошей місячно,  
80 „ квартално  
1.50 „ полрочно,  
3 зл. рочно.

В Америкі: 1 дол. рочно.

В Чехословакии:  
2 кор. місячно, 10 кор. полрочно,  
20 кор. рочно.

Ціны оголошень:  
Ціла сторона 120 зл., 1/2 сто-  
роны 60 зл., 1/4 стороны 35 зл.,  
1/8 стор. 20 зл., 1/16 стор. 10 зл.;  
оголошення малы за 1 мм. 20 гр.,  
в тексті 30 гр., перед текстом  
40 гр. При місячном и долшом  
оголошеню значна знижка.

Контото чекове Нр. 404.155.

## Не запедбуйме науки.

Вересень, то місяц, в котром молодеж по 2-ох місячних вакациях вертат знова до школы. У нас угрунтовала ся уж почасті потреба школы и науки, але не всі ище здают собі справу с вагы науки на селі.

Для иллюстрации вагы науки нехай послу- жат слова одного с данских министров, котрый сказал, же молочарні в Дании прото вырабляют добре масло, бо тамтешна сель- ска молодеж читат творы найлучших поетов. Што має поезия до масла, скаже неоден, а однак, коли подумае над его словами, переконаме ся, же слова тоты сут правдивы и же человек, котрый больше уміє, потрафит каждую річ лучше обдумати и зробити.

Для розвита рольництва не єст маловажне, ци сельска молодеж учит ся лем свого фаху рольного, ци тыж поглубят свои за- гальны знаня и стає ся приготвлена не лем до своей роботы, але и до житя, а до житя буде лучше приготвленный тот, у кот- рого буде высший загальний уровень відо- мостей и знаня. Уровень тот належит так розуміти, штобы каждый знал до чого стремити знал, як осягнути намічену ціль и штобы стреміл до ней с упорством.

С точки зрїня будучности нашего села, особенно погребне єст того упорство. Не угынати ся перед трудностями сельского житя, але ити сміло, с віром в побіду, до борбы о лучшу будучность и то не самому, але в масі, всі разом.

Розуміє ся, того всего не даст нам школа, бо она приготвлят лем діти до дальшой науки. Килько-ж то случаев єст таких, где человек, котрый окончил народну школу, забыл пак читати и писати. Забыл, бо по окончению школы порвал звязь с книжком и науком и стал ся на ново неграмотным. А школа, то лем початок знакомства с книжком. Отдає она правдивы услуги аж старшой молодежи, котра може зрозу-

міти лучше змысл книжки. Прото, тыж села повинни старати ся доконче о библио- теки и то не лем рольничі и господарчі, але также посідаючи творы выдающих ся поетов и писателей.

Читальня повинна быти другим и то барз важным осередком звязи с культуром. и то так через радио, як также через книжки и газеты.

Кромі того мусиме звернути увагу на барз важну справу. Писали мы уж о том в Лемку не раз, ани два, але не пошкодит ю ище раз руштити.

Села наши посылают каждого року незначне число молодежи на дальшу науку до міста. И ту именно встрічае ся часто с недостатком зрозумления своего власного добра. Не посылаиме дітей до школы по того, жебы были урядниками. Урядников єст и без того дост, а мы посылаиме дітей до фаховых школ, бо село потребує моло- дежи о приготвлении фахово-господарчом. Тотта именно молодеж може счасом станути в переді розвивающих ся кооперативов и постерунков промысла народного и ре- месельничого. Она возме в свои руки торговлю и организацию продажи рольных продуктов.

На той дорозі послідує розвязка перена- селения и безроботя на селі.

На засіданях громадских и гминных села повинни подумати о высылці способных и талантливых дітей до фаховых школ, але взяти от них собовязанє, же по здобытю знаня вернут они до родного села и трудом для села сплатят долг благодарности для него.

Не забудме, же дорога до побіды о лучшу будучность для селянина веде лем через науку. Лем, идучи по той дорозі, можеме дождати ся добробыта и вдоволения с почутя добре выполненных обовязков в виду своего Народа и Державы.

## Значене Польщи в европейской політыці.

Газеты цілой Европы росписовали ся широко о вызыті в Парыжі Начального Вождя польской армии ген. Рыдз Смиглого, котрой всі, без выключения, придают велике значене для удержаня мира в Европі.

По утраті всякого значеня и власти Лигы Народов, европейскы державы начали зно- ва творити бльоки, стараючи ся таким способом удержати в Европі военну равно- вагу. В сліа за тым не повела ся конференция о росоруженю и всі державы начали увеличати свои милитарны силы в небывалом до того часу масштабі. Военны бюджеты держав сут десят раз выши, як были в р. 1914., коли начала ся світова война.

Европа поділила ся на бльоки, бльок фашистовский, в склад котрого входят Німеччина, Италия и Венгрия и лягер „На- родного Фронта“, до котрого належат Франция, Росия и Мала Антанта. Англия, старат ся заховати нейтральность.

Перши гушлі в „лягері фашистов“ грає Німеччина, котра цілковито не скриват того, же ей цілю єст война с Совітском Росиом. Другый партнер того обоза, — Ита- лия не роспустила ище войско по побідо- носной войні с Абисыниом и по словам Муссолини'ого може в 24-ох годинах выста- вити 8 миллионов вояков.

Але и друга сторона не сидит даром. В Совітах военный бюджет достиг небы- валой сумы 14-ох миллиардов рублей. Обнижено также вік рекрута до 17 літ. Тотта увеличенє сил. войсковых значит, же так Совіты, як и Німеччина уж ся мобилизуют и выстарчит малый удар, штобы пришло зас до світовой ката- строфы.

Той катастрофі може помішати лем Польша и прото в том часі, коли, быти може, уж рішат ся справа о новой войні,



очи цілої Європи сут звернені на Польщу. Польща, як пише одна з чеських газет, являть ся таким державом, котра одна лем може помішати війні меже Німеччином и Совітами. Она также може недопустити до нападу Німеччини на Францію и Чехословакию. Прото тыж особенно Франции и Чехословакии залежит на том, шобы Польща была сильна и союзна. И прото тыж до Польщи приїхал французский начальник армии ген. Гамелен, в наслідок чого їздив до Франции Нач. Вожд польской армии ген. Рыдз Смиглы.

Видно в Парыжі зговорили ся вожди обох армий и Франция готова дати Польщі пожичку. В політиці польской зашол зворот в сторону Франции. Польща доказала тым, што веде она самостоятельну и от никого независиму політику. Правда, тота независимость коштує ю дост дорого, бо по заключеню через ню с Німеччином перед двома роками „берлинского пакта“ Німеччина, котрой военны силы до того часу были ограничены трактатом и ровнали ся приблизительно военным силам Польщи, зараз по пакті увеличила свой военный бюджет до высоты, перевысшающий 10 раз цілый державный бюджет Польщи. Але за тоту ціну Польща позбыла ся зависимости от Франции, котра втотчас не доціняла належито силы и значеня Польщи.

Тепер Франция поняла свою ошибку и Польща свободно вертат ся в сторону Франции, яко їй приятель и союзник, котра однак знає о том, же являть ся фактором мира в Европі.

ПОМІЩАЙТЕ  
ОГОЛОШЕННЯ  
В ГАЗЕТІ „ЛЕМКО“

## Край, где рядят самы бабы.

У нас скаржат ся часто хлопы на тото, же бабы тримають их за остро. Але шобы так они повіли, як бы нашли ся на острові Суматра (океан Великий) серед племені Менагкабау, жиючого в горах Паданг. Там напавду всеціло рядят женици, а мужины полнят обовязки слуг и невольников.

Оден подорожник, котрый проїхав 2 місяцы серед племені Менагкабау, так описує тамтешны отношення:

Може ніт красшой природы на світі, як тота велика высочина. Вокруг величезного озера лежат села, окружены со всіх сторон зеленыма, прекрасныма горами. Населенє тых сторон не має жадной лучности с внішнім світом.

До самого подорожника, котрый приїхав там в товаристві 4-ох маляєв, относили ся автохтоны без страху, але с покором. Видно было у них чудованє.

Подорожник зголосил ся у войта (Ибу), котрым была там гарда и стройна женщина літ 26. Ибу запросила подорожника до свого дому, котрый был найкрасшом и найбільшом хатом в селі. Мужины принесли подорожникови поживу и напитки, а пак

## С фронту домашной войны в Испании.

В Испании идут дальше завзяты бои. Повстанцы припустили новый атак на пограничный Ирун. Сильным огнем разили они кріпость цілыма годинами. Наконец дня 4-го вересня по 10 дневном безперерывном артиллерийском огні и килькох безуспішных атаках, використали повстанцы густу гмлу и дошли потихы под місто и нагло попали на улицы. Лем в где-котрых місцах правительственны войска ставили опор, а переважно цофали ся безвыстріла. Одны біжали ку французской границі, другы в сторону Сан-Себастьян. Милициянты, уходячи, подпалили місто. Повстанцы устроили страшечну різь всіх жителей, подозрілых о симпатии для мадрицкого правительства. Ирун, страшно знищений. Повстанцы zdobyли лем руины и грузы.

Того самого дня, коли упал Ирун, президент Испании Азана именовал в Мадрыті нове правительство, зложене с самых социалистов и коммунистов. Во главі правительства станул знаний предводитель красных социалистов, приятных коммунистам, Лярго Кабаллеро, котрого называют испанским Сталином.

Главный революционный комитет приказал обезоружити милицию находячу ся поза фронтом. Кто хоче быти милициянтом—голосит приказ—нехай зголосит ся до кошар и приготавлият ся до борбы на фронті, а кто не хоче ити на фронт, має сейчас отдати оружие и вернути до работы.

Але здає ся, же уж нич не уратує мадрицкого правительства. Повстанцы машеруют на Сан-Себастьян, другу кріпость. Поза тым повстанчи войска розбили значны правительственны силы на дорозі до Толедо и приблизили ся ку тому місту.

До Сан-Себастьян приїхал горничый отділ т. зв. динамитары. Мають они на случай

опанованя міста повстанцами высадити динамитом найкрасши будынки міста.

В Мадрыті коммунисты творят т. зв. окружны рады по образцу совітов, в Росии. Але социалисты сут противны тым радам. Взагалі серед недавных симпатиков „народного фронта“ приходит часто до непорозумлень. С дня на день увеличат ся в Мадрыті роспряженє.

## На советской Украине кыпит.

Букарестенска газета „Универсаль“ доносит, же населенє сел, лежащих по румунской стороні Дніпра недалеко устя рікы, услышало в ночи сильну артиллерийску канонаду со советской стороны. Домыслы, же то певно войско росправят ся с хлопами, оказали ся правильны.

На Украине серед хлопов отдавна нуртує фермент против большевизмским комиссарам, котрый увеличил ся тепер, коли приступлено до реквизиции хліба.

Комиссары терором удержуют лад серед населеня. За найменьший непослух высылат ся цілы родини на Сибир. Убийство пару комиссаров заострило репрессийны средства.

В минувшом тыждні появили ся комиссары в двох німецких селах, положеных над Дніпром. Хлопы — німцы отказали в выдачі того количества хліба, якого зажадали комиссары. Втотчас арестовано пару хлопов и загрошено, же ціле населенє вышлют на Сибир.

В ночи хлопы арестовали комиссарей, але одному с них удало ся выстрілити пару світляных ракет, котры были знаком для войсковых отрядов в Овидиополі. В годину погодивше загреміли арматы. Оба села спалено, опор селян переламано безвзглядно.

Лишенных при житю селян вывезено сейчас на стацию, заладовано до поїзда и вывезено на полноч.

двох мужичик розділо подорожника и запровадило до озера, шобы ся выкупал.

В том племені хлопец, коли вырастат уж на мужину, стає ся невольником. До того часу спал он с сестрами в головной хаті, а тепер переселят ся єго до малого посторонного домку, где живе аж до того часу, коли якаси женщина захоче выйти за него замуж. Яко муж, не єст он головом родини, але мусит робити все, што каже жена.

Мужины не мають там жадного маєтку, не мають также нич до сказаня ани в родинных, ани в общественных справах. Все мають женщины. Хаты, грунт, статок то все єст женщин. Хлопец носит назвиско своей матери. Як ся оженил, называт ся так, як єго жена. Если жена вышмарит єго с хаты, он вертат до матери и приберат знова назвиско матери.

При каждом дому находят ся 2, 3 або и больше хат для мужчин. Села сут невеликы, переважно 50 до 60 родин. Начальник громады называт ся Ибу. Все „Ибу“ поодынокых сел творят найвысшу раду племені. Тота рада выберат найвысшу законодательну власть, складаючу ся с 12-ох женщин, котры рішають о всіх найважнійших справах Менагкабау-ов.

Мужей не уважат ся там членами родини, але радше за гостей, котрых можна в каждой хвилі вышмарити. Случає ся тыж часто, же женщины міняють своих мужей,

або чирають ся на мужей с другыма женщинами. Крім того можна там также выпожичити своего мужа другой женщины. Случає ся также и так, же якийси красный мужчина має одночасно пару жен. Втотчас женщины заключают договор, по килько дней має он быти при каждой жені.

Товариско мужчина не має жадных прав. Коли ся оженил, стає ся рабом своей жены и всіх женщин, які там жиють. Поживу може принимати лем от своей жены. Шлюбы заключат ся там совсем просто. „Ибу“ кличе до себе мужину, котрый ся женит, и женщину и бесідує: „Женю тебе с том женщином. Доставиш 50 гульденов и 1 саронг.“

Жених отвічат:

—„Так, беру женщину и придане.“ Така єст ціла церемония. Жених вертат до дому, а женщины бавят ся через осем дней. Молодой муж може там прити лем в том случаю, если єго жена прикличе. Жены їдут, їют, співають, танцуют и оповідають собі ріжны анекдоты. Мужины ніт там ани одного. Они могут лем прирыхтовати поживу, подати до стола и прятати.

Так само ніт там клопоту и с розводами. Если женщина скаже ся для мужины барз недобра и брутальна, то мужчина говорит: „Иду от тебе“ и вертат до дому.

Таки то чудачны звычаи сут на великом світі,



## ПРИПАСЫ НА ЗИМУ.

В літі и особенно в осени єст много даров Божих, котры уміло перероблены обогачают сыпанец неодной хозяйки.

Штобы однак перероблены с'їстны продукты не попустили ся и не заплісніли, треба мати суху и продувну комору и пивницю. В пивниці могут стояти бочки с кышеном капустом, огурками, дїжки с солеными рыжиками и т. др.

В осени маме найбільше овочей, ярин и осенних грибов и тот час треба уміло выкорыстати, штобы в зимі было сыто и в коморі и на столі. Овочи переховуєме або в свіжом стані, або сушимо их, або тиж робимо с них мармеляды и повила.

Штобы овочи свіжи переховали ся долго, треба зривати их осторожно и посортованы укладати на полицках в сухой и продувной пивниці. Теплоота в пивниці мусит быти одынакова, не за высока, але не може быти низша от зерна, бо змерзненны овочи согниют. Овочи треба часто переглядати и надопсути выбирати. Потребує тото великого заходу, а притом переховати в свіжом стані оплачат ся лем отміны добры, котрых у нас єст мало. Зато єст у нас подостатком овочей планьших, котры, яко свіжи, не смакують нам, але высушенны, дають добрый материял до приправы страв на зиму. Єст у нас много сливок, грушок, квасных яблок, котры звычайно марнуют ся в осени, хоц перероблены належито, могут стати ся смачным и здоровым кормом. Высушенны в печах пекарских на плетених с ліщины драбинках, або нарочно в той ціли роблених сушарнях, дають добрый сущ на компоты. Можна робити с них также ріжны повила.

Найлучше єст повило с венгерских сливок (быстриц). Сливы, добре созрілы, переділити на половину, выняти косточки, перемолоти на машинці до мяса, уложити до великого рондля, або горнца, додати цукру (на 10 кг. сливок 1 кг. цукру) и смажити повило аж до цілковитого згущення. Усмажене повинно подпливати соком, коли пустиме єго кус на тарель. Ище горяче складаме до огрітых каменных горнцов и запераме в пецу по хлібі.

По выстудженю обявати добре пергаминоным папером и держати в сухой коморі.

Добре єст также повило, або так звана мармеляда, зроблена с мішанины—яблок, грушок и сливок. Со сливок вынимат ся косточки, а яблока и грушки перекрават ся и вирізує ся с них серединки с ядрами. Так очищенны овочи розварює ся и перепущат через друшляк, а погодивше поступат ся так, як и при повилі со сливок. Штобы повило не плісніло, додати при вареню  $\frac{1}{2}$  кавовой ложочки салицилы на 3 кг. овочей.

Кромі того с овочей можна робити вино, котре єст смачным и здоровым напитком.

### Вино с черниц.

Добре вино одержує ся с черниц (ожины). В той ціли черевит ся черницы и оставлят ся подушены через 5—6 дней в теплом місци. Пак выдушув ся через шматку сок с черниц, котрый по перемеряню зливат ся до бутлі. Отдільно заварює ся воду с цукром, причом бере ся два раз больше воды, як єст соку и на 2 л. воды дає ся 1 кг. цукру. По завареню и роспущеню цукру в волі заливат ся сок в бутлі горячом

водом. Бутлю треба выбирати такую, штобы теч доходила аж до половины шейки. По наполненю бутлі коркує ся ю, заливат ляком, або воском и через корок перепущат ся ферментацийну рурку (купити в аптеці). Если кто не має отвітного корка и рурки, можна также зляти сок оливом, котру перед зливанем вина до бутылок знимат ся ватом. По якомси часі в бутлі осяде осад, от котрого вино наберат терпкости. Тому добре єст от часу до часу переляти вино и осад усунути. Через таке переливанє убуде вина в бутлі и тому треба все дополнити бутлю вином (добре єст мати ище таке саме вино в отдільной бутлі) або, если вина нїт, то доляти перевареной воды так, штобы бутля была все полна.

Если вино хочеме передержати долше, то зливаме єго с бутлі аж по року, если перезначаєме єго на скору консумцию, то можна зляти єго до бутылок уж по 3—4 місяцах.

### Вино со сверболузы.

Барз добре вино дають нам овочи сверболузы (дикий ружы). Созрілу свеболузу (гече-пече) мыє ся и очищат с чорных шапочок. Очищену сверболузу всыпуєме до бутлі, додаєме пару родзынок и заливаме горячом водом, перевареном с цукром, причом заховуєме такую пропорцию: на 1 л. сверболузы даєме 3 л. воды и 90 дкг. цукру. Дальше поступаєме таксамо, як при вині с черниц. При ферментации сверболуза все подходит до горы, а коли осяде на дно (по 2—3 місяцах) єст то знак, же вино можна зливати уж до бутылок.

По зляню першого вина можна сверболузу зляти ище другой раз водом с цукром, причом можна дати тепер меньше цукру.

В загалі, если хочеме мати вина сильнийши, котры дають ся долше передержати, даєме больше цукру, а при винах слабших до скорого ужитя можна давати меньше цукру.

### Солены рыжикы.

Здоровы очищенны рыжикы с отрізаныма коротко коренцами спарити кыпятком и осушити на ситі. Осушенны укладати в каменных горнцах, або дїжечках коренцами догоры. Кажду верству рыжиков посыпати сильно сольом, переложити покрайном цыбульом и посыпати попрьом и бобковым листем. Полну посуду накрываме денком и прикладаме невеликыма каменями. Сос утвореный с рыжиков має все оплывати рыжикы, бо иначе запліснут. Переховати в сухом продувном місци. Солены рыжикы сут добром приправом до мяса, а также здоровым кормом постным до хліба або бандуры. Подає ся их так, же выняты с дїжки ополокує ся в воді, обкладат покрайном цыбульом и кто любит, поливат ся оцтом.

## МИЛИК пов. Новый-Санч.

В неділю 6. вересня 1935. отбыло ся в Милику торжество освяченя Талергофского Креста

Уже от години 12. перед чит. им. М. Качковского зачали зберати ся ся массы народа, переважно селян и молодежи со всіх околичных сел. Прибыли два хоры с Жегестова и Андреевки под дыргентуром г. Яценника. О год. 2. приехали священ-

ники: о. о. Роман Прислопский из Жегестова и о. Василий Бартко из Злоцкого. Из Крыницы прибыл делегат Центр. Общ. Качковского ревизор О. Яновицкий с женом.

Виділ чит. приготовил прекрасный трехраменный Крест с модрева. О год. 3. до многочисленно собранных селян перед чит. звернул ся со словом делегат г. Яновицкий, в котром пояснил значенє Талергофа для нашего народа, того Талергофа, котрый забрал масу жертв с интеллигенции и с селянства и звертаючи ся до молодого покоління, призывал их свято чтити память замученных отцов и матерей своих, котры страдали лем за тото, што не хотіли продати свого историчного имени и быти зрадниками, як тото зробили так легко за німецкы пінязі наши братья украинофилы, котры в своем озлобленю доходили до денунциаций на родных братьев.

Двадцет молодых селян взяли Крест на плечи и цілый поход рушил до місцевої церкви, коло котрой ждали уж священники, котры попроварили процесию на цмента, где отслужено панихиду по помершим Талергофам и посвячено Крест.

Прекрасну проповідь о Талергофі выголосил о. сов. Роман Прислопский, а друге слово о символичном значеню Креста, яко Креста терпіня нашего народа, выголосил місцевый парох о. Бугера.

По оконченю церковного торжества народ вернул до чит. где начала ся академия и промовы. Перше слово до гостей выголосил предсідатель чит. г. Шелестак, привітствуючи так многочисленно собранных гостей. С прекрасными промовами выступили представителі селянства со Щавника: г. г. Евстафий Милинич, Яценник, Циханский, Евгения Милинич, Жегестовский и инши. В своих словах представителі селянства, особенно тоты, што сами пережили Талергоф, представляли народу тот тяжкий Крест, котрый перенес в 1914—1917 р. наш русский народ.

Молоды дівчата со Щавника и Милика прекрасно отдеклимовали патриотичны верши о Талергофі. В часі промов слідовали цпродукции двох хоров, котры отспівали много народных пісень. Под умілом дыргентуром г. Яценника, оба хоры с Жегестова и Андреевки сут барз добре вишкolenы и могут выступати сміло перед интеллигентном аудиторьом. Прекрасне сольо выказала Стефания Русиняк с Андреевки.

На оконченє делегат О-ва г. Яновицкий предложил всіма силами росширять культуру у себе в селянском житю, в змыслі гигиєны в своей хижі, розведеня садов, пасік, поднесеня культуры поля и тым способом приходити до материяльного добробыта и заохотил горнути ся до читальні, где через читанє пожиточных книжок и газет можна научити ся неодного доброго.

Закрываючи академию, Предсідатель чит. г. Шелестак, подяковал всім гостям, делегатам и Вс. Священству за прибытє на торжество и закрыл торжество.

Честь Вам, Миличане, за Вашу охоту и труд, який вы жертвовали для сорганизованя того прекрасного торжества в ціли отданя чести погыбшим жертвам Народа.

Виділ чит. в Милику за свою роботу заслугує на велику благодарность и може быти приміром для всіх околичных сел и читателей.

Участник.



## Што чути в світі.

**Єрусалим** доносять, що постава арабов стає ся штораз завзятійша и надежда при-вернути нормальны отношеня єст штораз меньша.

Англицке правительство носить ся с намі-ренєм ввести воєнна положенє в Палестыні и в звязи с тым откликало осенны ма-невры.

**Париж:** В часі побыта ген. Рыдз-Смигло-го во Франції дошло до польско-француз-кой погоды, обнимающей справы войсковы, финансовы и господарчи. Погода тота єст результатом конференций, переведеных в Парижі ген. Рыдз Смиглым с шефами французской армии и членами правительства.

Франція згодила ся дати Польщі пожичку в высоті 2-ох миллиардов франков, котры будут выплачены в готовых грошах и в тех-нических материялах.

**Париж:** В звязи с вістями о хвороті Сталина, французска газета „Matin” подає, же Сталин єст хворый на дыхавицу, што мо-же спричинити смерть в каждой хвилі. Яко єго наслідника подає газета Воро-шилова.

**Стамбул:** Король англицкый Едвард VIII. в часі свого побыта в Турції запросил до Лондона президента Турції Кемаля Ататурка.

В Косинскі в Уральских горах найдено брылу плятыны (найдорожший метал на світі, подобный до серебра) о вазі 2 1/2 кг. Вартость той плятыны оцінено на 5000 фун-тов штерлингов (130.000 зл.)

**Берлин:** Знаний англицкый политик Льюїс-Джордж, в часі своей поїздки по Европі, отбыл долгу конференцию с Гитле-ром. Дыпльоматычны круги придають той конференції велику вагу.

**Париж:** Войска повстанцов опановали Ирун. Повстанцы атакуют тепер Сан-Се-бастьян, котрого положенє по упадку Ируну єст тяжке. В Ируні, котрый лежить недалеко французской границы, повстанцы урядили страшну масакру женщин и дітей; именно французскы власти открыли мост, через котрый старали ся женщины и діти утечи до Франції. На тот мост открыли пов-станцы огонь машинных карабинов и вы-били до ноги переходячи діти и женщины.

**Лизбона:** Повстанцы заняли місто Талабе-ра, отдалене о 70 км. от Толедо. В руки повстанчих войск впало 12 армат, цілый транспорт амуниции, 2 самолеты и 20 пан-церных самоходов. Втрата правительствен-ных войск выносит в людях 1500. вояков.

**Буенос-Ейр:** В провинции Сальта от пару дней шалє пожар степов и лісов на пространстві 540 кильометрах квадратных. Пожар знищил ряд осель и місточок.

**Берлин:** В Нормбергі начал ся дня 8/9. дорочный конгрес национально-социали-стичной партии. По мурах розліплено афиши с написом „враг світа Нр. 1. — боль-шевизм!”

**Відень:** Англицкый король Едвард VIII. не хотячи скупал ся. Он выїхал коло Греци-мадом лодком на море. Несподівано преїха-ла коло него скоро велика моторова лодка, котра захвіляла так поверхньом моря, же лодка с королем перевернула ся. Видячи того, моторова лодка завернула и помогла королеви выїти с воды.

**Відень:** Король Едвард VIII. выїхал с Тур-ции до Відня, где вложил визиту презыден-ту Австрии Миллясови, с кетрым бесідовав близко годину.

**Лизбона:** На 2-ох португальских кораблях выбухла револта моряков, росагитованых комунистами, котры наміряли прилучити ся до испанской воєнной фльоты. Бунт здав-лено. В часі бомбардованя кораблей через кріпостну артиллерию убито 12 моряков и ра-нено 20-ох. Залогу обох кораблей аре-стовано.

**Москва:** В окрестности Нижнего Новго-рода появили ся численны кырделі волков, котры нападают на стамок колхозов. Одно-му с колхозов волк зажерли в пару днях 15 штук статку.



## Вісти с краю.

**Варшава:** Один с польских бальонов „L. O. P. P.”, котрый принял участь в заводах о чашу Гордон-Беннета, загинув в Росии без сліда, віроятно в окрестностях Архангельска. На поиски бальона рушило килька совіт-ских самолетов и 2 польскы. Дотепер поиски тоты сут безуспішны.

**Варшава:** За преступны поступки, яких допустила ся Ванда Парылевич и єй това-щи, Флейшера и Голендер, предвиджена єст кара до 10 літ вязницы.

**Львов:** Во Львові дня 14. вересня отбыла ся велика ревия войскова. 50 тысяч войска всіх гатунков оружия передефильовало пе-

ред Начальным Вождом генералом Рыдз-Смиглым.

**Варшава:** Німеччина буде тепер скоро кріпости и полевы укріпленя в Прусах Вход-ных. Дорогом морском сprovedжат ся до Прус Вск. великы транспорты работников.

**Новый емеритальный закон** поправит положенє емеритов. Перед пару місяцями выдає декрет, в силу котрого емеритам не зачислено літ службы заробчой. Декрет тот допровадил многы родины емеритов в крайну нужду.

Тепер декрет тот має быти зміненый и ми-нистер финансов заявил, же приступлено уж до приготовления нового проекта закона, обнимающего всі справы емеритальны.

Проект тот буде подданный под дискуссию законодательных палат в часі приближающей ся осенной бюджетной сесии.

**Варшава:** В польских политичных кру-гах гварят, же сликанє Сейма буде оско-рене. Здає ся, же открыте новой сесии Сейма отбуде ся в половині жолтня. Пер-ших 6 неділь парламент посвятит справам загальным и господарчим, а при конці листопада приступит до уложенья нового бюджетного прелиминара. Всі министерства одержали уж приказ ускорити законо-дательны работы, штобы начас представить законопроекты Сеймови.

### Свято в Верховні Великой.

В неділю дня 20. IX, т. р. о год. 2-гой по полудни отбуде ся в Верховні Вели-кой ново-сандецкого повіта

### посвяченє

### угольного камня

под дом чит. им. М. Качковского.

Програма: 1) О год. 2-ой збор под читальном 2) поход на кладбище, где под памятником повішєных Муче-ников отслужит ся панихиду и выго-лосит ся промовы.

3) Поворот на площу чит., где тор-жественно заложит ся угольный камень. Вечером представлєнє.

О масову участь доокрестного насе-лєня просит. Правлєнє чит.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ

ОТНУЖДЫ И ГОЛОДА, ЛБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасєкурує ся

в асєкураційном Товаристві

ВИТА И КРАКОВСКЕ

во ЛЬВОВІ

Асєкурацію принимают на цілой Лем-ковщині

представителі: гг. Осиф Яновицкый — Крыница-Село и Ми-хаил Перелом — Сянок.